

**Təntən sagı tə, Polə nə púpúní v
pa
Təsalonikə
Kərisə lià tə nə
Təsalonikə tián təntən sagı
tə yuu wa sugu**

*Liù tə, v nə púpúní sagı kv tə
Kv yı *təntəv Polə nə púpúní kv.*

*Lià tə nə, Polə nə púpúní
Sagı kv yı təntən sagı tə, Polə nə púpúní v
pa *Kərisə lià tə nə, ba nə wulə Təsalonikə nə.
Təsalonikə yı kv wulə Masedwanə nagwanaa tə
wa.*

Sagı tə wa sugu

Nəjə kv tə yırı, Polə nə púpúní ba nə: Polə nə
dıga *Kərisə lià púlí təntə dən Təsalonikə nə. Yá
v dən yá mə, sə v dəri v jén *Zwifə-ba duən yáá
nə, ba nə wà v kàrà tə sèe, ba ga zıga v nə. Polə
dán púpúní sagı kv tə, v pa Kərisə lià púlí tə nə,
sə kv pa v tətəjı tə kwen kv tun kv va yáá wuuu.

Polə pià v bırı də, v pùé poli, yoo mama nə
vəli zəni, Kərisə lià púlí nədən təntə wa yırı.
Polə bwı ba nə, ba nə vəli yáá tə yırı, v dən ga
daņa ba jìàn, sə ba tə kwen ba tun kv ba doni
nətə. Ba cıgá yá dənì *Yuu-Tiu Zwezi-Kərisə túrí
tə. Yá twara yá jə Kərisə lià tə duən, ba duən yá
nə ti də Yuu-Tiu tə wà twi tə yırı. Polə pià, sə v
bırı ba tıga təntə yoo nə wá ya nətə.

Polə jònì Kərisə lià tə Tesalonikə nə

¹ À mù Polə də Siləven də Timote nə púpúní nə pɪn *Kərisə lià púlí tə nə, kɪ nə wulə Təsalonikə nə. Kɪ púlí təntə də nyɪna Yɪ də *Yuu-Tiu Zwezi-Kərisə nə vwə duən nə. Yɪ nə wá fwa pubwanɔ á yɪra, ɔ ga pa aba bɪcan sié.

Nətv tə Tesalonikə lià nə ken ba waa Zwezi nə
(*Filipə tián 1.3-6; Kolosə tián 1.3-8; 1 Tesalonikə tián 2.13-14*)

² Nə yɪjɔnɪ mama wa, nə yàá lòrì Yɪ nə pɪn aba, na ga kəni Yɪ lèèè máḡá mama, á mama yɪrɪ. ³ Nə yàá líí á yoo máḡá mama, nə nyɪna Yɪ yáá con. Nə líí nə tián tɔtɔɲɪ tə, á nə keni á waa Zwezi nə, wuuu á ma tɔn. Nə líí nə tián də kɪ tə á sonu, tə nə tɔḡa də, á nə zɪga diàn yala tə wa, á nə jə nə *Yuu-Tiu Zwezi-Kərisə con. ⁴ Nə nubɪa-ba, nə yèé də, Yɪ sóní aba. Ʋ kúrí aba, sə á ya ɔ mù lià. ⁵ Nə swìn suywáḡú tə nə bɪrɪ aba. Kɪ tà də nii sùràn cɪcɪ, kɪ yɪn də Yɪ diàn tə də Yɪ-*Siḡu tə tɔtɔɲɪ tə. Yá nə yà ba bèéé də, suywáḡú tə yɪ cígá. Á yèé nə nə jɪn nə tián nətv, nə ja yà á tətəɲɪ wa, sə nə ma san aba. ⁶ Kɪ mù nə pɪn, á yɪ ndə nə mù də Yuu-Tiu nə yɪ nətv. Á dí càn zənzən, á ma jon Yɪ sugɔ tə. Yɪ-Siḡu tə nə pɪn aba pupwən. ⁷⁻⁸ Yuu-Tiu sugɔ tə zɪḡí á con, kɪ ma yí Masedwanə nagwanaa də Akayi nagwanaa. Kɪ nətv dān pɪn á jì lià tə, Masedwanə də Akayi Kərisə lià tə mama nə mɛ, sə ba jì ndə á nə. Kɪ tə nə sùrí lá, ba swìn nətv tə, á nə keni á waa Yɪ nə, bwálí mama nə. Kɪ mù nə pɪn, nə mù con, kɪ ba dèḡ jə, sə nə kúò

swìn ka yoo. ⁹ Llà tē mama yáa swìn nē yoo. Ba maŋa nētɔ tē, á nē sēe á ja nēba, máŋá tē wa, nē nē twi á con. Ba maŋa nētɔ tē, á nē lwán pubuŋi á bà Yui con, ku pa á sēe á dugu wonwanan, sē á ga tun á pa Yui nē. Yui tētē nē wulə mi wa, ɔ ga yi cígá. ¹⁰ Yá á dàh dàh dē, ɔ biú Zwezi tē, ɔ pií ɔ bwin ɔ zìn tian wa, pií ɔ naŋa yi ɔ biàn. U mù Zwezi tē nē jon nēba Yui bùrà tē wa, ku nē biàn.

2

*Tutuŋi tē, Polə nē tun, Tesalonikə nē yoo
(Tutunan 20.18-21, 31-35; 2 Korentə tián 4.1-2,
5; 6.3-10; 12.12-15)*

¹ Nē nubia-ba, á tētē yèé ku zēni dē, nē nē twi á con tē, ku wà tutu yin. ² Á yēni dē, nē dí càn dē ba fifin nēba Filipə nē, ku tē wà dàh. Ku kwa nē, nē nyina Yui pin fēn kù ba nēba jē, sē nē swìn suywánú tē, nē biri aba dē, yìh nē swē tē ziga, sē tē cì ku yáa nē dē. ³ Nē kwìè tē, nē nē kwè là tē nē wà kunkun, nē à yèé pubunkukwun sùràn, nē twá nē ma kwè ba. Yá nē wà sírí ken, sē nē pa ba jén. ⁴ Yui dàh nē ni dē, nē mē, sē ɔ pa nēba suywánú tē, ɔ ma pa ku nēba. Ku mù nē pin, nē dàh nē swìn ku tà, sē nē ma poli ləzoni pwií, ku ya, sē nē ma poli Yui pùé. U mù nē yèé nē pubuŋi tē dēh, nē lù nētɔ. ⁵ Ndə á nē yèé ku nētɔ, nē tē wà gɔgara sùràn swìn á con mama, nē ga tē wà sùràn swìn, sē nē ma pià sēbia. Yui yèé yoo tētē zēni. ⁶ Nē wà pià, sē nē na dun ləzoni yáa con, ku nē yi á mù yáa con, nē

à yèé ba duèn yáá con. Yá nè yà ga nè ya Zwezi-
 *Kèrisè *tuntuna tē, nè yà wàá diàn nè dé á yuu
 wa. ⁷ Kù ga wà nētù yin. Nè waa yin bwàni á
 yuu wa máná tē wa, nè nè yin á con, ndè nuu
 nè ywàṅá ɔ bia yuu nētù. ⁸ Nè wɔbwawɔ tētē
 nè pɔn nè wà sóní, sè nè swìn Yɔ suywáṅú tē
 cɔcɔ nè bɔrɔ aba. Nè sóní dē, kù nè yɔ tɔan dē, sè
 nè sèe nè tɔ á yɔrɔ. Kù nētù tē bɔrɔ dē, á yoo cà
 kù pa nèba. ⁹ Nè nubɔa-ba, á dàṅ wàá á tiàn á líí
 tɔtɔncaran tē, nè nè yáá tɔn, dē gwarɔ tē kù nè
 yáá yí nèba yoo. Nè yáá tɔn tɔtɔn dē yɔcaw, sè kù
 pa nè dàn ká ya á liù mama yuu zɔlɔ. Yá nè swìn
 Yɔ suywáṅú tē nè bɔrɔ aba.

¹⁰ Nè yin dē á mù lià tē, á nè keni á waa Zwezi
 nè wuuu, nè bɔrɔ aba dē, nè yɔ lià tē, ba nè yɔ
 Yɔ nè tɔ, nè yɔ cígá tiàn Yɔ yáá con. Yoo mama
 yà tɔlé nè yuu wa, liù nè wàá nè nii nè ɔ caga
 kù yɔrɔ. Á mù nɔ kù tē, nè nè yin, Yɔ dē ga na
 kù. ¹¹ Á yèé dē, kù tē, nè nè tɔn dē á liù mama,
 kù ya ndè nyɔna dē ɔ bia nè. ¹² Nè kwè aba, nè
 pa á bɔcanɔ zùrɔ. Nè zɔgɔ diàn nè lòrɔ aba, sè á
 yà lià tē, á nè mɛ, dē Yɔ kúrí aba, sè á twá á ya
 ɔ pàrɔ tē wa, dē ɔ dun tē wa.

*(1 Tesalonikè tián 1.6-10; 2 Tesalonikè tián
 1.4-5)*

¹³ Nè nè swìn Yɔ sugɔ tē á con, á ken á waa kù
 nè ndè Yɔ sugɔ nè. Á wà kù cígá pɔn ndè ləzoni
 sugɔ nè. Kù cígá ga ya Yɔ sugɔ tē, kù nè tɔṅa á
 mù lià tē, á nè ken á waa Zwezi nè bɔcanɔ wa. Kù
 mù nè pɔn, nè kəni Yɔ lèèèe wuuu. ¹⁴ Nè nubɔa-
 ba, á dē yɔ ndè Kèrisè lià púlé tē nè yɔ nētù, tē nè
 wulə *Zwide nagwanaa wa, tē dē Zwezi-Kèrisè

nə vwə duən yura. Kú mù nə pɪn, á tətə dwíí tián tə ma kə càn á nə, ndə *Zwifə-ba də nə ken càn ba nə nətɔ. ¹⁵ Mə ba mù nə gva *Yuu-Tiu Zwezi də Yɪ nii *sùsùnà tə, ba ga fɪfɪn nəba. Ba mù ba Yɪ pùé poli, ba ga ya liù mama dɔɲɔ. ¹⁶ Ba mù nə kəni diàn ba cì nə nə, sə nə dàn ká swìn Yɪ sɔgɔ tə nə bɪrɪ lià tə, ba nə tà Zwifə-ba, sə kú jon ba ba cɔna tə wa. Ba fwa nətɔ, ba ma súrí ba cɔna tə wuuu. Yɪ bùrà tə dǎn twi kú ja ba, də máǵá don wa.

Polə swə, sə ɔ pìí ɔ va Tesalonikə

(Romə tián 1.9-13; Tutɔnan 17.14-16; 14.22)

¹⁷ Nə nubɪa-ba, nə mù də á mù pwèe nə yá duən, máǵá mancɪn wa. Nə kúú təlɔ duən nə, yá nə bɪcanɪ ga tə bɔɲa á yoo wuuu. Á fɪra jɪn nəba zənzən! Yá nə yà sóní, sə nə pìí nə na aba nə yíá wa. Kú mù nə pɪn, nə dǎn ma bɪbarɪ, sə kú yoo təntə wàní kú tɔn. ¹⁸ Nə yà pìà, sə nə pìí nə bà á con. Á mù Polə dédén, sə à bà á con, kú nəe cé duən, yá *Sɪtana cì nə yáá nə, kú wà wàní. ¹⁹ Nə jə yala nə wulə pupwən wa á yɪrɪ. Máǵá tə wa, nə *Yuu-Tiu nə wá pìí ɔ bà, á wá ya ndə dun yɔpuu nə, ɔ nə wá pa nəba. ²⁰ Á mù cígá nə ya nə dun də nə pupwən.

3

¹ Nə dàn wuuu nə ga, nə kúú wàrì nə dànì. Nə nɪ də nə mɛ, sə nə ya Atenə wa yəbə cɪcɪ. ² Kú mù nə pɪn, nə ma tɔn Timote á con. Ʋ yɪ nə nubɪu Kərisə yɪrɪ, ɔ nə tɔɲa ɔ pɪn Yɪ nə. Ʋ də swìn Zwezi-Kərisə sɔywáɲú tə ɔ bɪrɪ. Nə tɔn wá á con, sə ɔ bà ɔ kwè aba ɔ pa á zɪɪ diàn, sə á kə

á waa Zwezi nè wuuu. ³ Nè pià, sè á liù mama dàn ká dugu Yu cwəŋə tə, càn zənzən tə yiri, nè nè wulə tə wa. Á tətə yèé də, ku yoo təntə me, sè ku tun nè mù lià tə yira, Yu nè kúrí. ⁴ Máná tə wa, nè nè yin á con, nè yà dí yáá nè swìn á con də, ba wá kə càn zənzən nè nè. Á də yèé də, ku mù máná təntə dàn nè yí. ⁵ À dàn nè kúú wàri à píní, à dànì á yoo wa. Ku mù nè pin, à ma tun Timote á con. À tun wá, sè v bà, v na nətə tə, á tə nè keni á waa Zwezi nè wuuu. Fən yà jə nè də, *Sitana nè wá bà v dédén aba, sè v yigu aba v pa á tun yokukwɪun. Də ku nè jigə nətə, v wá pa nè tətəŋi tə mama jì tətə.

⁶ Síún nè, Timote pií v nan á con, v bà nè con. U swìn v biri nəba də, yìèn tə mama zìən á con. U swìn də, á keni á waa Zwezi nè wuuu. U biri nəba, nətə á nè sonu də, nətə tə á nè tə líí nè yoo zəni zəni máná mama. U biri nəba, nətə tə, á nè pià, sè á pií á na nəba, ndə nè də nè pià, sè nè na aba nətə. ⁷ Nè nubia-ba, ku mù dàn nè pin, nè wəwalə tə mama wa, də nè càn zənzən tə mama wa, nè bicanı zùri, də á nè ken á waa Zwezi nè. ⁸ Á zıga diàn *Yuu-Tiu nyiən tə wa. Ku mù nè pin síún nè, nè mu kúú pií ku siŋə cígá cígá. ⁹ Bèèè won nè, nè wá tun, nè ma kə Yu lèèè á yiri? Nè wàri nè nyina Yu lèèè nè kəni nè zwèe, pupwən tə yiri, nè nè jə á yuu wa Yu yáá con. ¹⁰ Tıtun də yıcau mama, nè yáá lòri Yu cígá cígá, sè v pa nəba cwəŋə, sè nè pií nè na aba nè yíá wa. Nè pià nè sùrí won tə, ku tə nè mùri aba, á nè keni á waa Zwezi nè, yoo wa.

¹¹ Nè nyina Yu tətə, də nè Yuu-Tiu nè wá kwen

cwəŋə, sə nə wàní nə bà nə na aba. ¹² Yuu-Tiu wá pa á sonu tə, á nə swə duən tə súrí wuuu. Yá, sə kú sonu tə wàní kú yí là tə duən tə mama, ndə nə sonu tə yiri tə nə, nə nə swə aba. ¹³ Yuu-Tiu nə wá pa á zıgı diàn. U wá pa, á ya v là tə v nə tı, cuna dân ká ya á yuu wa, liù nə wá cəgə aba kú yırı, ba nə wá caga á nii nə tə yırı, nə nyına Yu yáá con kú máŋá tə wa, nə Yuu-Tiu Zwezi nə wá piı v bà də là tə mama, ba nə yı Kərisə nə tı.

4

Nətv tə Yu nə swə, sə v là ya yoo

(1 Piyerə 1.14-16, 22; 4.1-5; 1 Korəntə tián 6.13-20)

¹ Nə nubıa-ba, kú tə nə nə kúv wá swın, nə súrí lá, nə bırı aba nətv tə, á nə mə, sə á ya, sə kú poli Yu pùé. Á cígá twá kú nii nə. Nə dân tə lóri aba pwəpwə, nə ga kwè aba də *Yuu-Tiu Zwezi yırı tə, sə á tə tvn kú, á doni nətən. ² Á yèé kwìè tə, Yuu-Tiu Zwezi nə pın, nə ma kwè aba. ³ Kú tə Yu nə pià, kú mù nə yı, sə á yà là tə, v nə yá á tiàn míámíán Yu jìàn wa. U pià, sə á cı á tiàn nə, á dânà ká pəni duən nə vee vee. ⁴ U pià, sə á liù mama lwarı, v nə mə, sə v ja v tiàn nətv, v ma swe v kan, sə kú bırı də v yı Yu nə tı, ndə liù tə, v nə Yu tə nə mə, sə zilé ga ya kú wa. ⁵ Á dânà ká twá á pùé yokokwınan fıra tə nə, ndə liù tə nə, v nə yèrı Yu, nə yáá fwa nətv. ⁶ Kú mù yoo təntə wa, sə liù mama dân ká fwa yoo tə, kú nə wà mə v don yıra v nə yı v nubıu *Kərisə yırı. U wà mə, sə v cùgò v yìèn.

Nə dí yáá nə swìn ku yoo tə á con cígá cígá, nə tún lá. Yuu-Tiu wá kə càn lià tə nə, ba nə tɔŋa tə yolwana təntə. ⁷ Á yəé də, Yı wà nəba kúrí, sə nə tún durən yìèn. U kúrí nəba, sə nə yà lià tə, nə nə yá nə tiàn míámíán. ⁸ Ku mù nə pın, liù tə, ɔ nə vıga kàrà ku tə, ku ya Yı nə ɔ vıga. Ku tà ləzwənə nə ɔ vıga. Yá Yı nə pın aba ɔ *Siŋu tə.

⁹ Ku nə yı nətv tə, á nə mɛ, sə á sóní duən yoo wa, ku kúv ba dèñ jə, sə nə púpúní ku nə bırı aba. Yı tətə nə dí yáá ɔ bırı aba nətv, á nə mɛ, sə á sóní duən. ¹⁰ Mə ku mù sonu təntə nə, á swə lià tə mama, ba nə yı à nubıa Kərisə yırı, ba nə wulə Masedwanə nagwanaa tə mama wa. Nə nubıa-ba, nə tə lèrì aba, sə á tun ku, á doni nətən. ¹¹ Á kəni diàn, sə á ya duən nə də sié, sə á liù mama ywàñ ɔ tətə tutunan yuu, sə á tətə nə tun də á tətə jìàn, á ma pìà á nii wodiu, ndə nə nə bırı ku aba nətv. ¹² Ku nətv tə nə wá pa lià tə, ba nə tà Kərisə lià zìlí aba. Yá á kúv ba ya liù mama yuu zılı.

*Ka pı́ ka bwin ka nan tian wa yoo
(1 Korentə tián 15.19-58)*

¹³ Nə nubıa-ba, nə pìà, sə á lwarı cígá tə, ka nə wulə lià tə, ba nə tıga tə yoo wa. Ku nətv wá pa, á dān ká ya pucɔnı wa, ndə lià duən nə, ba nə ba yala jə, də ba wá ya də Yı. ¹⁴ Nə pın cígá də, Zwezi tıga, ɔ pı́ ɔ bwin ɔ nan tian wa. Yá mə nətv tətə nə, Yı wá bwin tıga tə, ba nə keni ba waa Zwezi nə, ɔ súrı Zwezi nə.

15 Á nɔ̃jə kɔ̃ tɛ, *Yuu-Tiu nə kàrì nɔ̃ba, nə nə pìà, nə swìn nə bɪrɪ aba. Kɔ̃ mù nə yɪ, mánǎ tɛ wa, Yuu-Tiu nə wá pìí ɔ̃ bà, nə mù là tɛ, nə nə tɛ wà tɪ tɛ, nə bá dɔ̃ tɪga tɛ yáá. 16 Yɪ wá pa nii. *Malɪkɛ pìú tɛ wá swìn dɛ kori nɔ̃farɔ̃. Ba wá wúrí Yɪ nabwana. Kɔ̃ mánǎ tɛ wa, Yuu-Tiu tɛtɛ wá nan Yɪ nə ɔ̃ cú. Yá *Kərisɛ là tɛ, ba nə tɪga, wá dí yáá ba bwin ba nan tɪga wa. 17 Kɔ̃ kwa nə, nə mù là tɛ, nə nə wulɛ mu wa, nə dǎn wá zàn, nə twá ba nə. Nə wá dɪ bakwan tɛ wa, nə jérí Yuu-Tiu lanworu tɛ wa. Yá nə dǎn wá ya dɛ Yuu-Tiu mánǎ mama wuuu. 18 Á twá sùràn tɛ tɛ nə, á ma zùrì duən bɪcanɪ.

5

*Ka kə sírí mánǎ mama, ka dǎn Zwezi yoo
(Matɪə 24.36-51; Likə 12.35-40; 21.34-36; Romə
tián 13.11-14)*

1 Nə nubɪa-ba, kɔ̃ kúv ba dɛn jɛ, sɛ ba púpúní ba pa aba, sɛ á lwarɪ mánǎ tɛ dɛ dɪn tɛ, nə *Yuu-Tiu nə wá pìí ɔ̃ bà. 2 Á tɛtɛ yèé kɔ̃ zɛni dɛ, Yuu-Tiu túrí dɪn tɛ wá ya, ndɛ ɳwìàn nə yáá ɳɔ̃, tɪtɪn nə mánǎ tɛ wa, ba nə ba ɔ̃ yoo buɳa. 3 Mánǎ tɛ wa, ləzoni nə wá swìn, ba wú: «Lɔ̃v zùrì! Yolwan kúv bá bà». Mɛ kɔ̃ mánǎ tɛ wa, nə ba wá cùgù míámíán naa nɛdɔ̃. Kɔ̃ wá dɪ ba yuu, ndɛ kan pùé nə yáá yɪ nɛtɔ̃, ɔ̃ lɔ̃rɪ mánǎ wa. Yá ba liù mama bá jén. 4 Nə nubɪa-ba, á mù tà yikunu wa là, sɛ kɔ̃ dɪn tɛntɛ ma twi kɔ̃ dɪ á yuu ndɛ ɳwìàn nə. 5 Á mù mama yɪ poni là, á yɪ yɪcav là. Nə tà yikunu là, nə yɪ poni là. 6 Kɔ̃ mù yɪrɪ nə, nə mù dǎnà ká dwèe, ndɛ là duən

nə. Nə mù kúù wà mɛ, sə nə dwèe, sə nə ya là tɛ, nə nə buɲa zəni. ⁷ Mə titɪn nə nə, là yàá dwèe. Mə titɪn nə nə, là yàá nyu swana ba sú. ⁸ Nə mù là tɛ, nə nə yɪ yɪcav là, nə mɛ, sə nə ya là tɛ, nə nə buɲa zəni. Nə mɛ, sə nə kəni nə waa Zwezi nə wuuu, nə ga sóní là tɛ, kɪ mù nə wá ya ndə pamana lugu gànù nə, nə nə zva. Nə ga jə yala də Yu wá jon nəba nə cuna tɛ wa. Nə tì yala tɛntə nə, ma fwa ndə pamana lugu yupuu nə. ⁹ Yu nə kúrí nəba, sə v twá də nə *Yuu-Tiu Zwezi-*Kərisə, v jon nəba. U wà nəba kúrí, sə v cùgù nəba də v lɲa tɛ, tɛ nə dáá zənzən. ¹⁰ Kɪ mù yɪɪ nə, Zwezi-Kərisə tɪga nə yɪɪ, sə nə vwə nə tián v nə ma ya mu wa, də nə nə tɪga, nə à yèé də nə mu nə wulə máɲá tɛ wa, v nə wá bà. ¹¹ Kɪ mù yɪɪ nə, sə á dàn duən jìàn, sə á san duən nə, ndə nɛv tɛ á nə dí yáá, á tɲa kɪ.

Sagɪ tɛ yígúré s̀r̀àn

(Ebərə-ba 13.7, 17, 20-21; Galasi tián 6.1-2; Romə tián 12.17-21; 1 Korəntə tián 1.8-9)

¹² Nə nubɪa-ba, nə lòrì aba, sə á zìlɔ̀ là tɛ, ba nə tɲa á pwərə wa. Ba mù là tɛ *Yuu-Tiu nə tún, sə ba ywàń á yuu wa, sə ba kwè aba. ¹³ Á zìlɔ̀ ba zənzən, sə á sóní ba ba tɪtɪɲɪ tɛ yɪɪ, ba nə tɲa. Á ɲan bɪcan s̀iɛ ya á pwərə wa.

¹⁴ Nə nubɪa-ba, nə kwè aba, sə á caga yayɪnyɪna tɛ nii nə, sə á zùrì ba tɛ, fən nə jə ba jìàn. Á saɲa labwana tɛ nə, á jana pínú ba mama yoo wa. ¹⁵ Á cia á tián nə, sə liù mama dàn ká tɪn lwanɪ, v ma ɲwín lwanɪ. Máɲá mama, sə á tɪn zəni duən yɪra də ləzoni tɛ mama yɪra.

16 Dɪn mama, sə á ya pupwən wa. 17 Á jùná Yɪ máná mama, á dànà ká yá. 18 Á kəni Yɪ lɛɛɛ won mama wa. Yɪ nə swə kv nətv tə, á nə vwə *Kərisə yɪra tə yɪrɪ.

19 Á dànà ká cì Yɪ-*Sɪŋu tə tutuŋɪ yáá nə. 20 Yɪ yáá twá v nii *sùsùnù nə, v kàrì aba. Á dànà ká mun kàrà təntə. 21 Yoo mama wa, sə á dí yáá á ywàń kv wa, á kúrí kv tə, kv nə zɪən, á lɪ á pa á tiàn nə. 22 Yoo mama wa, cia á tiàn nə də lwanɪ yɪrɪ mama.

23 Yɪ tə, v nə pɪn bɪcan sió pa, sə á ya v mù nyiən míámíán. V mù nə wá cì, sə á tətə mama, də á pubuŋa tə, də á jərə tə, də á yɪra tə dàn ká ja lwanɪ, ba nə wá swìn tə yoo, dɪn tə nə nə Yuu-Tiu Zwezi-Kərisə nə wá pɪí v bà. 24 Yɪ kúrí aba. Yá v mù ga nə yɪ pùé nədv. Yá v mù nə wá tun kv yoo təntə.

25 Nə nubɪa-ba, á jùná Yɪ də á pa nəba. 26 Á jùná lià tə duən tə mama, ba nə yɪ á nubɪa Kərisə yɪrɪ, də zilé zənzən də sonu, ndə Kərisə lià nə mɛ, sə ba fwa nətv. 27 À lòrɪ aba pwəpwə də Yuu-Tiu yɪrɪ tə, sə á kàrì sagɪ kv tə lià tə mama yáá con, ba nə yɪ nubɪa Kərisə yɪrɪ. 28 Nə Yuu-Tiu Zwezi-Kərisə nə wá fwa pubwanv á yɪra.

Yu soywánó sagı
Nuni, Southern: Yu soywánó sagı New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 30 Sep 2022 from source
files dated 8 Feb 2022

d18530a7-7259-5f23-92b6-70e3abe5f3fa